

國朝駢體正宗

國朝駢體正宗卷七

蘭韻軒詩集序

少司馬雲椒先生示中以所爲詩曰

御覽集爲卷四曰蘭韻堂集爲卷八中當昔游屢見新製
屏風團扇斜行細書坐臥移時輒能上口今幸窺全豹益
鑿夙心旣受而卒業諷其篇章尋其旨趣竊爲品目蓋有
四焉曰微曰適曰遠曰深借惠施之彈喻爲莊氏之卮言
將期達意無嫌取譬夫文入之心存乎勿眇故日月作繪
難狀其容六合名篇以愚見謂先生澄懷體物構以精裁
思無路而不通物無形而不肖譬夫車輪之虱屢中應心

棘刺之猴日出遂見則所謂微者此也詩本乎言亦播爲
樂言之多婉則感人也深樂或不調則聽而思臥先生身
依

清禁抽此秘思游卷阿以矢音效崧高而作誦固宜體歸
莊雅音取和平若夫山公宦達早游竹林幼興清標宜在
邱壑何嘗不對酒當歌興高采烈而意思安閒應手赴節
吹彼天籟止乎衆心譬夫交衢自舞徒御不驚屨帶相當
並忘腰足則所謂適者此也情動於中恒多鬱勃託諸比
興務在綿邈故志微唯殺北鄙見嘒穆如清風雅材所尚
先生高挹羣言優游案衍超然物表自得天機譬夫姑蘇
神人比綽約於處子清廟之瑟有唱歎之遺音則所謂遠

者此也公家擊磬或動路人男子樹蘭遂移物性故知笑
歎無端則惟木石同體先生早緣負米書劍飄零已過中
年漸多哀樂山陽聞笛河梁把酒送將歸而贈別賦懷舊
而傷神靈襟獨寫餘味曲包譬夫車子轉喉哀感頑豔成
連海上能移我情則所謂深者此也微以言乎其思適以
言乎其度遠以言乎其氣體深以言乎其性情凡此四端
足該六義中往涉世途頗知作者握珠懷璧類有其人或
輕肆以爲才或襞績以爲學或詰屈以爲古或激壯以爲
雄先生獨存雅體微示別裁於彼數家非惟不能寔亦不
暇爰因研說書在末簡附驥名章敢希前志

自序

汪中

昔劉孝標自序平生以爲比跡敬通三同四異後世誦其
言而悲之嘗綜平原之遺軌喻我生之靡樂異同之故猶
可言焉夫亮節慷慨率性而行博極羣書文藻秀出斯惟
天至非由人力雖情符曩哲未足多矜余元髮未燥野性
雖馴麋鹿同游不關擯斥商瞿生子一經可遺凡此四科
無勞舉例孝標嬰年失怙藐是流離託足沙門栖尋劉寶
余幼罹窮罰多能鄙事賃舂牧豕一飽無時此一同也孝
標悍妻在室家道輒軻余受詐興公勃谿累歲里煩言于
乞火家構衅于蒸梨蹀躞東西終成溝水此二同也孝標
自少至長戚戚無懽余久歷艱屯生人道盡春朝秋夕登

山臨水極目傷心非悲則恨此三同也孝標夙撻羸疾慮損天年余藥裹關心負薪永曠鰥魚嗟其不瞑桐枝惟餘半生鬼伯在門四序非我此四同也孝標生自將家期功以上參朝列者十有餘人兄典方州餘光在壁余衰宗零替顧景無儔白屋藜羹饋而不祭此一異也孝標倦游梁楚兩事英王作賦章華之臺置酒睢陽之苑白璧黃金尊爲上客雖車耳未生長裾屢曳余簪筆傭書倡優同畜百里之長再命之士苞苴禮絕問訊不通此二異也孝標高蹈東陽端居遺世鴻冥蟬蛻物外天全余卑栖塵俗降志辱身乞食餓鴟之餘寄命東陵之上生重義輕望實交隕此三異也孝標身淪道顯籍甚當時高齋學士之選安成

類苑之編國門可縣都人爭寫余著書五車數家覆誦長
卿恨不同時子雲見知後世昔聞其語今無其事此四異
也孝標履道貞吉不于世議余天讒司命赤口燒城关齒
嘯顏盡成臯狀跼步才蹈荆棘已生此五異也嗟乎敬通
窮矣孝標比之則加酷焉余于孝標抑又不逮是知九淵
之下尙有天衢秋荼之甘或云如薺我辰安在實命不同
勞者自歌非求傾聽目瞑意倦聊復書之

漢上琴臺之銘

并序代

汪中

自漢陽北出二里有邱焉其廣十畝東對大別左界漢水
石隄互其前月湖周其外方志以爲伯牙鼓琴鍾期聽之
蓋在此云居人築館其上名之曰琴臺通津直道來止近
郊層軒累榭迥出塵表士多平曠林木翳然水至清淺魚
藻交暎可以棲遲可以眺望可以泳游無尋幽陟遠之勞
靡登高臨深之懼懿彼一邱寔具二美桃華淶水秋月春
風都人冶游曾無曠日夫以夔襄之技溫雪之交一揮五
弦爰擅千古深山窮谷之中廣廈細旃之上靈蹤所寄奚
事刻舟勝地寫心諒符元賞余少好雅琴猶諳操緘自奉
簡書久忘在御弭節夏口假館漢臯峴首同感桑下是戀

於以濯足滄浪息陰喬木听漁父之鼓櫂思游女之解佩
亦足高謝塵緣希風往哲何必撫弦動曲乃移我情路曰
宛彼崇邱於漢之陰二子來遊爰迄於今廣川人靜孤館
天沈微風永夜虛籟生林泠泠水際時汎遺音三歎應節
如彼賞心朱弦已絕空桑誰撫海憶乘舟巖思避雨邈矣
高臺歸然舊楚譬操南音尚懷吾土白雪罷歌湘靈停鼓
流水高山相望終古

答趙艮甫書

楊芳燦

艮甫足下前奉贈言敬析名作發函伸紙歡喜無量風藻
豔發天才踔厲五音繁會九光徘徊范史事外殊有遠致
庾郎胸中故無宿物出入懷袖諷覽無輟情文兼擊辱郎
君之謙下揄揚過當恐君子之失辭中心欽欽以感以愧
僕少好辭章頗自鏃礪殫精圖史願情典墳托豪素以行
懷撫錕缶而發唱庸音自効結習所存如臆黠之甘烟若
螻蛄之赴濕或歌或号一詠一吟希掉鞅於文壇庶繼組
於作者無如人事煎熬家累驅迫竊升斗之祿爲風波之
民邊障十年羈宦萬里堙腐性靈疲頓竿牘偶有撰述輒
自慙慙深藏篋笥不欲示人志業蹉跎光陰遷貿茲復倦

爲塵吏甘作山郎筋驚雨綬不利走趨心頑質堅偏好冥
默屬文多骯骯之習當官有蕭杌之稱推排已久覺老物
之可憎揜抑自傷知盛年之不再王微之宦情本淡江革
之僻疾難瘳時恐急景凋顏牢愁驅壽思欲返菱荷之初
製踐復鶴之舊盟而塵累尚牽山裝未辦眷言疇昔彌用
次懷兼之京華知舊意緒寥落天涯偷好蹤跡睽澗握管
無侶舉觴莫屬春寒陰陰獨坐閒館輕塵盈几飛鳥窺戶
管寧榻破向榻牀空我懷云勞不可說也足下馳俊譽於
早歲揚采烈於名區青萍結綠望氣者知貴濫脇號鐘知
音者競賞含香慚越蜚聲日遠方當雍容臺省翔步雲霞
道直遂清相見或易藉得挹注宏抱雪滌素懷跂予望之

心乎愛矣川途間隔久遲作報茲乘風便聊布夙心

秋林集序

楊芳燦

昔昇之抱疾握牘而賦五悲惠開無年撫鏡而發三歎遂
乃聽白楊之蕭瑟傷病梨之凋悴寄思無端鬱伊不釋嚴
霜欲霏驚碧樹之早落商飈乍起恐修夜之不賜秋林名
集旨遙深已昆謀五丈少負異才夙抱奇志有文園合之
節概慕蘭相如之爲人高門鼎貴而有并介之風甲族膏
腴而無綺靡之習篤嗜圖籍殫精細素李謚著神士之賦
王符撰潛夫之論一咏一唸乃其餘事而時出雋語老宿
咸推竹柏之契證於靈襟泉石之華交於麗矚含懷曩遠
造語幽粹神棲颺藹之表氣凌煙霞之上惜乎長轡未騁
逸步屢蹶如屈蠖之終蟄加疹疴之不斟玉三獻而遭別

博十擲而得韃非關操技之拙可知賦命之奇是則幽蘭
易萎誰尋空谷之香神劒長埋永閼窮泉之彩昔王仲祖
疾亟慨然曰若人竟不得四十乎齋志以終長懷無已以
今方古有同悲矣然恒幹難侍而聲華不滅隱德未耀而
弓冶克傳枚乘之後生臯夏侯之門有建宗風斯在世澤
弗渝珠水依源槐根仰蔭宜乎蓴樓三兄啓楹書抱竹冊
胖胖兢兢思託不腐者也某常讀雙溪舅氏遺文其稱五
丈也有曠代逸才之目企慕風采不見爲恨茲受斯集而
卒業焉都官晚出得讀表聖之詩玉渙後生竟序次山之
集不可謂非厚幸也已

重修漢平襄侯祠碑記

楊芳燦

伏羌縣城西隅舊有漢平襄姜侯祠歲久傾圮乾隆癸卯春余宰斯邑改而葺之縣人感請立碑余削簡而稱曰溯夫郭塢之大星已隕蜀郡之王氣將終以羈旅之孤臣受軍國之重寄卒能奮忠勤仗膽義摺拄偏安之局恢張薄伐之勛洎乎虜主迎降全師解甲猶思運曲逆六奇之策收卞莊一舉之功壯謀未成苦心莫亮揆其本末有得言焉按蜀志侯諱維字伯約天水冀城人紹忠節之家風負倣儻之才畧傾身養士結髮從軍仕魏官中郎參本郡軍事值蜀兵壓境太守寒盟信乃見疑窮而歸命武鄉侯見而異之教以虎步千人目以涼州上士馬援明智之識臣

亦擇君豫讓俠烈之風士爲知己建興十二年武鄉侯卒
進大將軍錄尚書事封平襄侯遂乃繼祁山六出之舉興
石營九伐之師拔臨洮三縣之民糾漢樂二城之衆部落
面向羗戎響臻自隴以西可斷而有也無如讒臣構費閹
豎擅權撤渭上之兵作沓中之避官鄰內逼勅敵外侵徒
恃劍門之險竟失成都之守陰平間道乏銀衛鐵牡之防
綿竹孤軍有猿鶴沙蟲之慘君甘銜璧土盡輿尸棄三分
之業廟社成墟奉尺一之書英雄束手遂使三軍斫石氣
湧如山五將投戈涕流被面吁何悲也夫范蠡策越保甲
楯於會稽田單復齊馳鐵籠於卽墨莫不奮折翼於已墜
噓死灰而復然名著區中功成理外蜀雖顛踏外有聲援

霍紹先之勁卒尙鎮夜郎羅令則之重兵猶屯白帝向使
前驅五萬仍用蜀人白梃數千盡坑魏將艾先自斃會亦
我禽金刀之祚中興火井之光復熾未可知也而乃空留
密表竟發陰機寃遭紀信之焚莫效勃蘇之哭嗟天道之
難問詎人謀之不臧是則裴世期之記注尙屬知言孫安
國之陽秋徒爲目論矣縣爲古冀城地侯之故土也黃神
紫嶽曾誕英靈雲馬馳車應歸魂魄某式瞻遺範來謁崇
祠霜露年深丹青歲古報功之典攸缺守土之責奚辭爰
翦茅茨聿修棟宇抒下士之丹忱焚椒築鬻紀前賢之偉
績勒石磨崖庶幾風雲鬱起遙連蜀相之祠松價森行永
護樂公之社云爾

金朗甫誄

楊芳燦

元默紀年蕤賓旅月翰林庶吉士仁和金君朗甫以疾卒於邸舍年僅二十有七嗚呼哀哉月沈朧輝荷隕鼃采是殲才子實喪俊民若其才性都長風儀淵令知言九變敏逾陸生異字千名富於朱育英辭壯思殫見洽聞識安釐冢之古文緝顯節陵之隆簡賦以高麗見奇詩則清工入妙狹襟單慧者莫測其涯量也文戰屢提巍科早登以通博之才與清英之選羅舍則胸吞彩鳳阮籍則手搏赤猿桐露槐煙之什老宿傾襟蘭臺桂苑之篇名流袖橐方當分榮鳳掖被蔭鑾坡晝日濡毫凌雲授簡何期時當大瘡景值凋年墨翟逢王侯岡阨丙孽嚙欲騁而驥驟之步中

徂舍香甫越而蘭茝之華蚤落幽局長閉昭途永隔嗜其
酷矣某年當疲暮跡尚飄浮公幹著論空負經奇文舉屬
詞多傷偏宕君顧癖同痴嗜密締心知昧柔逾時然糠水
夕時或逍遙閒夜徒倚涼雲魚鳥流連竹肉諧婉雖春星
墮杯曉露沾袖不自知其沉頓也隙駟不留濛陰遽戢埋
玉樹於重泉鬱青霞於修夜韓卿長逝論詩孰辨其音初
輔嗣云亡談易誰明乎繫表嗚呼哀哉昔袁炳異才文通
作傳孝若素交潘岳著誄敢援斯義爲之詞曰

文星系絕光嶽精淪崑邱碎壁凌門落鱗嬰溟始奮扶搖
未申曾不中壽喪此哲人翳惟哲人神姿夙悟薦嗜典墳
殫精細素麗藻風飛高辭河注耀羽丹山揚輝元圃館啟

翹材名登上第射策東堂讀書中秘子野博聞承天多藝
行對三雍待成十意方題朝籍遽執殤宮泣瓊兆夢巢鷺
徵凶朝薤晞露秋條迕風行善遭命懷和告終疇昔交期
忘形語默臭味風雲談諧翰墨星晚露初燈青月黑促坐
論文微言相得舊歡已矣宿諾何追壞陵絃斷山陽笛悲
西樹長靡南雲易殞行行孤轡寂寂遺撤嗚呼哀哉

湖南湘鄉縣丞吳君誄

楊芳燦

夫義風振世秩何愧乎末班修名冠倫數何歉於中壽赤石不奪獨守耿介之心沉檀甘焚不銷鬱烈之氣古來節士多出卑官黃綬榮於龍藻銀佩美於垂棘如湘鄉縣丞吳君者信有徵矣君諱英玉字玉泉蘓之常熟人也周章令族孰哉華胄代有名德世非壙僚君生負瓌姿幼秉琦行斑管在手風雨蜚聲蓮花插腰虹霓耀彩無如射策不售贖帖徒勞喟然曰丈夫處世安能碌碌爲章句儒乎遂焚王壽之書擲逢萌之楯明習吏事揣摩兵鈐以武功爵起家得楚南零陵尉拊循編戶矜恤率人有陸景倩之真清行員半千之實惠三年書考以卓異聞時值蛇巫不靖

大封構孽君勇氣慷慨雄心憤薄短後從軍之服高前却
敵之冠宵眠砂磧笑看宛轉之刀曉渡冰河淨洗連錢之
馬餽餉無缺轉輸若神時嘉勇郡王總統戎律目元康爲
快吏上許歷之雋功特擢湘鄉丞君激揚自勵奮發敢爲
密箐叢林佻身獨往嬰灰箭火舍命不渝受瘡癘之毒涇
櫻風霜之爪甲積勞成疾閱日不堪按劍撫膺空餘裹革
之志攬鏡照影知有犯兵之欄隨總兵花連布移營冷風
均巨猾恣睢列營屠潰君力疾抵拒斃於馬鞍山下嗚呼
哀哉幕府愍君勞績奏牘上聞

詔贈國子監學錄

賜金祭葬從祀忠義祠錫以儒冠祀之宗布槃瓠革而遂

偃靈臺之旌鴟鴞變音迺獻泮宮之馘君之英靈可以慰
矣夫諫以美終文由累行安仁操翰表汧城之功延之綴
辭昭滑臺之節式遵前典乃作諫曰

矯矯吳君古之節士徒抱高才而無貴仕低首風塵卑棲
棘枳誓命戎行不甘委靡壯氣飛揚龍阿知己實命不猶
若擠而止膏明則燿玉纈翻毀君之入仕不卑抱關一命
之吏威惠克宣山多義鳥地有廉泉三年報最輿論稱賢
蠢爾苗頑挺灾荆楚鋒蝟斧蟾公行呂鉅上將專征統茲
勁旅君請鑿行枕戈負羽躡穿膝暴執獲搏虎不避阽危
寧辭茹苦頭塵不浴衣焦不申時芻曾遂轉粟秦國馳驅
盡瘁忠以忘身炎風委火蠻烟瘴雲蛇涎吹蠱域沙中人

遠嬰沉痾竟邁艱屯精魄銷亡壯心未已磨盾作書據鞍
爲几笳鼓翻營力疾而起深溪湍瀑危峯屢屨攀藤附葛
賊來如蟻被髮呼天慷慨赴死賫志以終沒而猶視嗚呼
哀哉瑩絜孤嗣亦抱亮節隻身提劍萬里負骨脫命鯨牙
招魂馬鬣乞彼高文鐫此貞石

九重軫恤

殊恩祇承錫之儒秩名德已升國殤往矣精靈有憑爲書
素旗余言可徵

荆園倡和集序

楊揆

昔元許左丞可用與其弟可行倡和楚人馬熙及其子楨與焉今所傳圭塘欸乃集皆閒適之作也蓋其地則平泉綠野其人如正始元嘉機雲之屋東西求點之山大小蘭亭高譙諸子得預勝流蓮社佳遊門生亦參末座烟霞獨淚魚鳥相羊其屬思之清工非綠遊會之超曠歟余與伯兄弱歲餓驅早年薄宦西羈隴坂北滯燕臺夢永嘉之西堂憶懷遠之故驛離索之感殆不可任旣而兄馳上計之車余守校書之館第五頡靈臺之下或十日不炊董威輦白社之中無一廬可庇衡門風雪襟素蕭然遂乃尋遊債之臺移乞病之牘同車入洛聯轡過秦陟三嶮之嶮熾覽

二華之奇秀蒼茫弔古悵悵懷鄉剔蘚看碑磨厓灑墨樊
川句裏老樹遺臺長吉囊中神林鬼塚循省所作羈旅爲
多況復官齋共被未及三旬幕府從戎又逾萬里長征歲
暮黃河已冰遠別魂銷青海無極空抱矛漸劍炊之懼愧
非投觚擲楮之才而兄一障空乘十年不調原鴿隴雁嗟
予季以來歸塞草關榆盼阿干而不見傷離憶遠優悒如
何今夏余在甘藩兄視余官舍塵袂纔捧離心已撼爰開
庾信之小園敞潘尼之閒館洛濱之集許仲容同遊臨海
之詩屬長瑜共和水木明瑟風光澹沲霞初星晚不無佇
興之辭花底擗前時有言懷之作自謂廿年以來未見此
樂然而文案鮮暇邊徼未寧富赤白囊之交馳及朱墨圍

之錯置敢就吟而廢事聊假日以銷憂以視圭塘之嘯歌
自適者其境迥殊無怪乎言之未能工也顧篇什漸多不
忍棄置爰偕伯兄哀輯付梓而余又量移西蜀慨轉轂之
莫定感搏沙之靡常尋篋中之作每憶前塵題漢上之襟
預期後會聊將袍襖抄播搭之詞偶記年華當樓羅之歷
云爾

重刻獨孤憲公毘陵集序

趙懷玉

夫習爲纂組詎知麻枲之有功長於蓬茨難語臯應之合制文章之道何莫不然故尚藻績者目不眊典謨矯侈靡者口薄言騷雅硜硜之守其失維均不爲沂沿恐昧流別有唐之興體凡三變天寶而後大歷以前燕許云徂韓柳未盛則蘭陵蕭功曹趙郡李員外與常州刺史獨孤憲公實比肩焉蕭雖忤於權門李乃汗夫僞命揆諸文行未免參差公則讜直著於朝宁愷悌洽乎方州凌轢四君見李舟序祖述六藝孝經一卷首志立身孔門諸科幾得具體此其可貴一也唐世文字存者寥寥苟有聞見亟宜購訪而茂挺之作屢收於什一遐叔之製尤掇於零星殘篇軼簡人

以爲病公則首尾廿卷尚符唐志靈光之殿歸然獨存積
玉之圃浩乎無涘菁華所鍾神物如護此其可貴二也退
之起衰卓越八代泰山北斗學者仰之不知昌黎固出安
定之門安定實受洛陽之業公則懸然天得蔚爲文宗大
江千里始濫觴於巴岷黃河九曲肇發源於星宿此其可
貴三也琴瑟專壹聽者思遷牲醪日陳食者生倦求其相
濟是在兼長公則猷升邦國言炳竹素識大識小亦元亦
史語其矜貴明堂清廟之儀迹彼脩遠青山白雲之概惟
昭斯融雖淡不厭此其可貴四也然宋槩旣失未聞續雕
石渠之外世罕傳本是集從歙縣鮑君廷博假得爲長洲
葉氏奕所藏明吳文定寬在東閣時錄出之本也葉以趙

氏吳岫本馮氏曹甲本互相參校自詡完書披覽甫周譌舛百出病餘多暇悉意勘讐落葉漸掃珠船屢獲原集之外復得公雜文如于首其謚議誅傳有涉於公足資考鏡者竝附篇後於是已三免譌夏五少闕永嘉本出人無遑讀之勞宏農帳深客見不傳之祕矣夫浚儀社古形圖去宮峴山碑高涕隕行路秉彝攸好靡閒今昔維公盛德克紹前軌故植檜已朽見蔽芾而如逢召公降露無庭對膏雨而猶思郇伯矧夫撰述彌足珍焉余之爲是刻也亦使人知遺愛勿替廉吏可爲身登九列不若沒世有稱裝累萬金不若名山藏業後之司土同致瓣香學優仕優咸有所勸匪徒表章篇翰蒐輯叢殘苟侈山淵以恣采伐而已

甌北詩鈔序

趙懷玉

夫奕秋對局思汨聽於吹笙隸首握竿戒紛心於擬鵠欲
求舉世之賞必有顛門之詣然崇巖孕靈良珠不因而託
體陽風扇和穉葩詎從而舒色冰水造化質殊疑釋鐘鼓
既考感分憂怒薑鹽入羹雖濟五味之用元黃布采各成
三就之功彼能傳之無疑皆得性之所近詩歌之道不其
然與吾族雲松先生天生異才少有奇氣成都躡一壘之
業厭次足三冬之用租船詠史奚囊貯詩馬卿遊梁著子
虛而始顯蕭生射策得甲科而斯稱迴翔西掖之邃出入
東觀之祕紅藥翻砌香芸在書分其餘藝足了十人出其
新弓盡傾一座中禁亦聞詞藻當宁旋試吏才叱馭天關

紆紘地軸一麾出守方輿謠於袴襦六月行師快從戎於
書劍上公虛席賓佐盍簪禰正平之筆札實獲我心劉穆
之之視聽不疲肆應墨常浮于盾鼻句已滿乎弓衣彬彬
乎有折衝之風焉經緯之略焉露版載宜薦牘交上過貪
泉而便酌約羅浮而終到不爲郅都之鷹惟隨閱道之鶴
七十二峯之寺幾遍紗籠九十九溪之水遂臨繡服蓋仕
至六察官不爲不高績考六載時不爲不久也俄以鞠獄
舊讞微呈吏議

天子眷念迺勲方切嚮用而先生念太夫人春秋高遠請
歸養年裁四十六爾陵華彌絜逕鞠無恙侍奉之暇怡情
枕藉著有咳餘叢攷一書頗極蒐討之富雖隨方以滲漉

尤究意于此興第其詩集都爲若干卷先付劖劖焉冥心
狀物精義入神濤瀾倒海四瀆不能息肩奴僕命騷六經
皆我注脚臨淮將兵忽新壁壘士行取材無遺竹木碎金
必更鼓鞴積玉遂以成山得諸助者旣優入於古也獨至
昔樂天揚聲於唐室務觀奮迹於宋朝先生掛讓其間殆
堪鼎足乎後進之士翕然從風有目咸賞不脛而走書之
万本秃兔頰以何辭傳之四方入雞林而增價可謂斯道
之龍鸞別集之冠冕矣或曰世人論詩多宗初盛先生不
卑宋格自名一家厯得乎中將非其至不知子質姬文繇
平運會楚謠漢風發乎胸臆襲中郎之兒猶然虎賁畫雲
臺之人詎規麟閣豈許身稷契遂誇草堂復生託意神仙

便謂長庚不死哉或曰儒者不朽首期立功先生身出樞
要久膺

眄遇使其敷歷當致節旄而迺疆仕歸田坐消耆艾篇章
雖瞻居諸可惜是又不然令名壽考古有難兼山林鼎鐘
事非一致沈中達之知命恨其泰遲王叔朗之宦情思之
爛熟讀十年之書富于陶頓傳一卷之文榮于令僕孰得
孰失夫人辨之也懷玉識謝綆汲力辭蒞撞鄭莊交游及
攀大父之行泉明晨夕幸接比鄰之近謂堪適道繆許定
文旣辱誘託遂逾歲月千穉業就自有名山之藏一辭贊
窮竊爲青雲之附云爾

讀賦卮言序

沈清瑞

昔西河氏序詩詩有六義其二曰賦蓋古無賦賦卽詩也
載覽姬末名篇颺起蠶理鍼理玉瑛蘭陵笛材釣材伎奇
楚國大聲競作椎輪託始遂乃定名曰賦別系於詩匪直
畫風雅之鴻界亦且翹騷些之別構跨羸涉漢接軌沿波
賈有荀心馬兼宋骨以若枚叔菟園揚生羽獵靡不窮文
極貌虎視西京炎運旣東茲格少變班密張妍崔雄蔡逸
各營心匠共吐意珠鋪陳之體大開駢儷之塗漸導魏晉
六代人抱雕章織句錦繡之中抗才雲霞之上或鏘價於
一篇或耀能於隻字意製詭其相錯源流分而益遠迨閱
三唐之世彌綜諸變之長爭奇於官韻壓字尤強極材於

試格植辭必兩斯皆筆苑之大略賦手之極能矣若其闕
妍說麗博妙甄奇不有英絕曷談斯苑於是列錦爲質文
園抽祕於前不歌而頌中壘貢臆於後孟堅謂古詩之流
士衡騁體物之勢劉勰詮賦大暢風流居易賦賦式觀元
始清言吐屬則山水深其性情賦旨徘徊則風花粲其齒
頰得心之奧知言之選胥是物也求諸吾黨能者疇與吾
友念豐勃率文心熟精選理笙簧於羣雅餒烝於衆菘成
讀賦卮言一卷岷山導江力探原本鄧林取木務折支枝
初哉首基之矣乃若類以讎類瓜區而芋疇例以從例鍼
投而磁引解之則縷分比之則璧合抑其次也至於九柯
十匠各造門戶雙珠兩劔竝耀隍池則又殫見洽聞遑遑

而在良由理者宰道之器識者洞虛之實學者執古之轡
才者耀采之符凡前修之雅文先士之盛藻循塗互異睹
指咸歸是則陶匏不同器而總適於耳蘭芝寧共氣而俱
悅於魂蓋論述者數千言賦家準獲於是而備吁其傑矣
裁錄既竣委弁簡首且曰屬有異同之見當爲引伸其辭
予故著其詣微之力如彼閱覽之學若此若夫一斑所窺
千慮有得則書諸別幅云

重修梁昭明太子祠碑文

代

顧敏恒

夫人能照物者必貞金石之壽文足行遠者不絕椒蘭之芳故有前星淪曜乃并照于古今少海迴瀾或均潤于幽顯風徽尚存降監不遠俎豆尸祝其何間然貴池縣西廟者故梁太子祠也秩祀於唐錫號于宋懿神之德昭乎簡文之序炳乎王筠之冊粵稽前史厥有明徵卷懷此都尤著靈異聰明仁孝之美不介自孚水旱癘疫之災有禱必應亦已書之銀管勒以青碑紀載班班弗可贅已或謂神與齡未驗富璧無徵使景命之在躬行蒼生之蒙福不知大厦非一木所支鹹池非敝算可救青絲白馬壽陽之敵騎紛來葦席邪巾西鄰之責言迭至晉安罹吞土之厄湘

東遘推刃之災惟神生樂死哀不與其難斯古人之獲佑
非天道之無知矣或謂神降靈襄陽立儲建業高齊非石
城之館原廟豈秀山之陵撫是方隅罕聞警蹕不知撫軍
監國利賴實繁臨水登山傳志多闕訪舊聞于故老索陳
跡于廢墟橋陵弓劍葬軒帝之衣冠芒碭風雲睨高皇之
魂魄乘空馭氣何所不之金蟬翠綬仰止斯在不可謂神
之無功其地弗福其人也或謂神揮扇返風饋糧賑乏事
多幽渺迹涉元虛不知白龍化去尚憶釣車大鳥歸來仍
棲冢樹申生佩玦且通夢于新城子晉吹笙亦昇仙于緱
嶺考諸曩昔不少靈奇豈盡鄒衍之談天齊諧之誌怪乎
廟之規模夙稱巨麗璇題納月金爵承雲曰文選樓存古

蹟也有殿祀其先推孝思也閱有歲年漸亡舊觀丹青剝
落粉墨眵昏崇壇就圯則駸蹙零星雕甍欲傾則風日穿
漏余職在守土愆然于心爰出俸金以倡紳士並命僧嚴
達募之四境以廣檀施鳩工庀材縮版搆土于乾隆戊戌
春經始以己亥秋月訖功輸負增美像設維新更拓前規
創置舞榭歲時享祀婆婆樂神是役也輸金者廣至執事
者鳧趨藉英靈之麻廕順民庶之豫歡將比大梁舊國長
懷公子之恩豈若吳興故堂特畏憤王之怒也哉旣告厥
成謹刊之石

眞率齋初藁序

顧敏恒

僕與蓉裳楊君託膠漆之密契有葭莩之世親駢負而蝨趨蟲鳴則蚤躍淄澠同器笙磬共音中心藏之爲日久矣乃者哀所述作鏤其詩歌授簡鄙人俾爲之序夫良玉旣剖不待下和之泣血也利劍旣躍不待茂先之望氣也僕學無淵源詞乏文采而稷下杜口早聞魯連之談東隣捧心先識西施之貌情在於是烏能無言君秉氣英淑負材經奇襟披蕙風袂灑蘭雪清談而霏屑如鋸列座而無衣不寒徒倚永日移魏收之胡床沉冥下帷銳管寧之木榻凡汲冢斷簡龍威祕文夷吾所知者七十二代曼倩能誦者二十萬言度以陸公之厨貯以邊韶之笥胸咽丹篆掌

盈墨書並遺糟粕噉菁華笙簧六經肴核百氏故其所作
如威鳳五色仙霞九光錦扇繽紛花葉麗爾燃龍燭以照
海建翠旂以翳天聞者動心觀者眩目予季父響泉先生
每日蓉裳之才可云秀絕寰區庾蘭成之麗藻日以清新
揚子雲之瓌詞謂之淡雅別有真賞不同妄嘆也憶在弱
冠卽罹屯穴王哀廢其蓼莪原憲羹其藜藿耕石不富食
糠何肥時則願爲博士讀元家之異書將游大人挾齊客
之鳴瑟或割臠以遺江革或倒屣以迎仲宣見說難孤憤
願與同遊諷游山九吟幸其並世人思薦禰衆共推羊雖
未能問道璇華校書天祿而方褰裾以謁吏部旋束帶以
從督郵仄聞仕宦之鄉是昔要荒之服天高日淡地古沙

平弱水西流黃河東走馬嘶風而噴玉雕睇野而生雲君
於是時飮黃羊之饌擁青兕之裘弦邏遶之槽酌蒲桃之
酒此間才子不異從戎何事參軍但工蠻語必且以兒女
之情挾幽并之氣陽關三疊甘州八聲混沌高謔防風起
舞他日者傳之以一雙黃鵠遞之以千里明駝當使曲中
楊柳倍覺風流塞上焉支別增顏色耳茲有事於剖珠恐
見譏於倚市而君方以廣忠益集參稽夫豈海神匿跡堅
避畫工長康隱形見欺蟬葉所可同日而語哉况乎一別
千里相思各天尋君紫邏畏逢吹夢之風寄我翠鴛慮有
沉波之字寘此懷袖如聆音聲是又僕一人之私而與君
兩得其願者矣祖帳將設離樽欲傾聊書所懷并以爲別

與莊葆琛書

楊夢符

葆琛足下自君旋轅僕亦卽次稍遠城市遂如幽棲斗室之外旁構一園枯篁號夜但聞冷聲落葉滿地不見履跡生徒二人日與接膝思殺于理殊不入神擘屢而荅至忘土音昨者韞山筠谷相繼南去稚存西河同聲異處知旣益希動不相應間有造作莫析疑義思傷于內癘勝于昔不知帶緩嗔怪僮僕每至宵柝四應晨雞三鳴寢不成寐起而逡巡始自覺獨客之難爲繁憂之易入也顧念足下行已及里拜母于室啞啞爲笑病婦下牀弗藥而喜復于暇日讀書爲樂從此十年或出而仕智則周矣識則卓矣行己之義不負所學進可以砥廉呈能厲風迹以正逸德

邊亦可晦心折節窮日力以勗今聞旣有一世遂復千古
以此言樂樂亦足矣鬱鬱以處豈日能達至若夢符年旣
差長學又不逮內無堅計身無定名已踰謝裕著作之時
復遲毛義捧檄之喜眷戀桑梓不忘晨昏用是忍忍以待
日月冀得尺寸上報二人然而良馬之迹不獨騏驥利劍
之鏑不惟干將浮鴻干海忽沒飛波採玉千山乃見白石
况茲童木瞻惟枯城獨知守根不殖將落事又何可必乎
哉足下知我故以爲言仰惟清風勉旃自愛

國朝駢體正宗卷八

南城會煥賓谷輯

武成頌

孔廣森

臣聞在天垂象金精耀參伐之旗惟聖憲時雷豫習行師之繇軒皇御籙先修赤水之征唐后垂裳必輯青邱之暴亦有周宣薄伐近在太原殷武哀師不踰荆楚而三年有賞易已象其成功千里來歸詩尚歌其永久方之今日靡得而言焉欽惟

皇帝陛下秉武三曾抗稜八表銀麈拓地金虎開圖建木以西鑿空萬里長榆而北列燧千城象載形方規矩上黃麟之瑞銅街闕邸呼韓刑白馬之盟雲呂十旬記里之車

合軌鞬胥九譯萊幣之史同文幽遐畢屆其梯航泰遠咸
歸乎幪幪而禹功不到西流自絕於朝宗梟性難馴東徙
仍迷於革響乃有兩金川者鼈令游魂犬豕餘孽化殊天
外犯燹塞以稽誅俗遠華中比夜郎而自大粵在丙辰之
歲曾與戊己之師宥以投戈許其載木恩寬蠶社未封武
觀之鯨鯢榮假分符俾禦危山之魑魅而乃獍心反噬鴟
義矯虔不格兩階之干自投一面之網促浸土司索諾木
負阻窺覷憑遐翻覆豨蛇薦食屢及於鄰疆蠻觸尋爭漸
連於內地燼拉土司僧格桑蚤與駞比罷本羆生外順內
違每泄駒支之語高巢陞制擅詢句町之仇議者猶以天
險不可升鞭長莫能及轡野修戎之日亦緩前禽禽山合

玉之年非無後至文臣臆決請罷守於珠崖

哲后沈幾命洗兵於玉壘蓋以王鈇威遠睽矢勝殘保大定功有征無戰三辰所照靡亭毒而或遺九伐無私孰孤離而必討於是發軍城郭簡銳微盧闕虎朝鋪人問沈黎之罪跼鳶夜渡衆爭敵愾之功師出一年月聞三捷僧格桑棄地而遁小金川全境以降然而虎負嶠間困猶思鬪鷹栖鞬上飽卽背人此則因壘之師所以勞其再駕渡爐之役必將示以七擒者也

聖天子昃晷思賢綸書策將重鑿門之命寄專闔之司爰以阿桂爲定西將軍營平受律羌罕料其成禽裴相視師淮蔡聞而悸魄若乃隆衝弗弗旗鼓堂堂朔斡燕弧韞章

鵬轍索倫蹶張之卒吉林超距之徒八旗試弁之倫六郡
良家之子韜車百雉挾風隼以駢驅善矢三鏃怯雲鷗而
墜影庚鈴制勝九天九地之兵甲帳懸符四正四奇之陣
再平美諾一掃荒陬繫彼妻孥降其部落月氏已死漆函
傳飲器之頭徽側爲俘驛騎致蠻銅之鼓惟是逆酋索諾
木連雞失勢知必及於

天誅鋌鹿已窮猶自恃其地利環山列柵背水施礮奮螳
臂以當輪網蝥絲而結衛羊腸西轉自回九折之谿牛尾
東來未鑿五丁之路雪凝陰阪經炎夏而不消日遠陽關
積漏天而生瘴我師長馳渠答直冒槍雷指揮則屋瓦皆
飛叱咤則丸泥失險危城折箸械九設而九攻壯士乘墉

布再懸而再斷文淵負羽獨進壺頭士載裹瓊親踰劍閣
遂以去年八月十五日破勒烏圍戈矛照月鶴鵝之隊彌
雄旌旆生風鴨鶩之聲盡亂斯時也

天子方講蕤螭均修文虎觀咨儒官於劉向遣謁者於陳
農羽檄星馳疊下五申之令銅籤夜警仍披二酉之編豈
非

天亶聰明

聖兼文武者與刮耳崖者軍道之衿喉賊居之窟穴地稱
巖邑山挺石林孝子望而旋車元侯行而東馬六師併力
五尺略通道古攻其東南亞夫備其西北

九重籌筆乃懸御於氐羌三帥宣猷更分功於卻范狼弧

氣肅曠弩先飛箕壁星高火輜具舉進攻黃寺震懼其祆
神屢獲殃徒係纍其母妹我氣方銳破竹無頓刃之勞彼
力亦殫窾木有丁衝之急幕危燕散鼎沸魚驚方陳縛主
之求始請吠堯之罪今年二月四日索諾木兄弟就禽罪
人斯得脅從罔治誅非填服無停睢水之流降者如歸豈
有陰山之哭檻車執訊露板慶成金城上奏七朝達於長
安都護飛書五日聞其吉語當赤囊驛報之時正

翠蓋巡行之地勲過獲嘉之改縣事同聞喜之名鄉
皇上展謁

兩陵奏膚

七廟靈臺上祭卽陳丹水之功畢郢升祠自兆素鱗之慶

善歸聖母敬上徽音奉

慈輦以豫游遵滄河而哀對杏花萋葉兼省春耕茆水芹
宮式迎秋駕太山玉策探瑞算之無疆魯殿金絲告武成
之有截旣而赤融効職朱陸移疆襄城迴訪道之輿巴徼
振凱旋之旅條侯之屯細柳擐甲冑以來朝耿弁之在臨
淄降乘輿而親勞然後有事

宗社大獻馘俘秋官請纓夏卿執鉞戒彼費留之賞廣我
通徹之封秬鬯青圭來召公於漢澣蔥珩赤芾拜方叔於
新田李霍勲名咸開東第鄂褒毛髮竝繪南宮雅奏勤歸
軍容譁卸玉關偃葦紫塞銷兵鶴膝羊頭仍入蘭綺之庫
龍文驥子散歸仙掌之山雖復金毋環來樊侯鼎出冠軍

絕幕刻石字於狼胥博望浮槎控河源於牛渚未若殊鄰
稟朔荒裔占風竇布時供賧錢歲納冉駝叩筴交輸流沫
之珍奇傑侏侏僑疊聽提官之謳詠是則豐京王會列三
臺於陰羽之中洛水明堂朝九采於應門之外不假銜鉤
之后載十一征豈惟通譯之邊餘四萬里赫赫乎

一人之聲靈煌煌乎千古之盛事綜茲經緯可感五而登
三勒之簡編將襲六而爲七者已臣忝列鵷行粗窺豹管
聞西戎之耆定均慶於竝天念東土之瞻光感縈於私渥
懷深晞尹語罄揄揚雖不工於文章尚慚朱鷺饒歌之作
庶以載夫功德亦附白狼槃木之餘謹獻頌曰

於鑠

上聖奄有下矩象寄柔道龜沙卽牧奇幹善芳肅慎文啓
東漸日融西底月戶孰敢不庭膏我齊斧九姓內藩廿年
外侮蠢讐大邦侵擾西土邊吏上言

宸居赫怒秉節凋牙發璋徵琥桓桓定西國之疆禦總領
戎旃師干甄部青叟從行白徒束伍有瓊斯鷹其矯如虎
署道披圖指形聚黍裂彼右肩斷其唇輔爾險何依爾遠
何怙縫革衝礪叩籠飛炬破易撥趨動若摧腐羌豪帥醜
剖耳是聚井底困蛙穴中竄鼠五兩振威重山夷阻季母
旣禽精夫亦虜戎庭分犁苗人安撫紅旂之捷奏

行在所讓德於

天告功於

祖大武承謨達孝纘緒吉躋上

陵甘露有潛瓊冊述徽璇宮秩祐

安輦輦與洪臚清籙般資協周祈沈觀滬水若恬旒登祇
順扈輯瑞岱宗陳風媯渚淑問西庠祭菜東魯展案崇今
上儀稽古飲至策勳愷歌率舞青壇三陔緹帷重組嘉乃
戰多慰我勞苦昔奏采薇今歌杖杜文淵帷幄武人樽俎
榮以旂常申之袞黼形繪雲臺聲垂銅柱

天語龍轡雲章鳳舉紀跡峻崖勒崇膠序詞揜岐陽典高
响嘒乃闢南端載升旗寧察采師師徹行楚楚右列作士
左班祈父鱣奏靈鼗鯨鏗猛虞僑榮榮鐸尸禺鼙鼓兩觀
既誅重巽式溥復稅農疇緩租國庾化洽橫舍仁流圓圖

廣青衿員赦赭衣侶既肅春霆亦沛夏雨九塞清塵兆人
安堵唐平蜀道周省淮浦尚誦昌黎猶詩吉甫以今準往
瑣瑣何數

天錫

皇帝神聖文武於萬斯年爲天下主

戴氏遺書總序

孔廣森

東原先生姓戴氏諱震徽州休寧人也學於古訓言行可法以薦爲四庫全書纂修

賜官庶吉士春秋五十有五乾隆丁酉五月二十七日疾卒凡所著文章經義若干卷叔父農部公先生之昏因也綴而刊之廣森嘗聞先生緒論又感先生崇闡漢儒而不終其志以歿乃爲序曰緬惟樂遊講藝訪太傅於石渠元日談經坐侍中於重席時則玉羊旣遠金虎初開著學官者凡四十家說稽古者成數萬字至若五是六診之徵定君陽武三科七缺之法弊獄淮南士苟通經皆能致用蓋原其授受本屬參商敘其世年未睽昌闕是以祖之前師

沿之後葉北方戎馬不能屏視月之儒南國浮屠不能改
經天之義夫學有優劣者時也經有顯晦者數也五君晚
出非漢博士之傳干禩相仍廢鄭司農之註縱橫異說別
創先天顛倒聖文悉更後定特以腐儒炫視易謬驪黃未
士明經原求青紫但遵甲令粗知帖括之詞疇克庚言紹
彼先民之作敏而好學信而好古惟於戴君見之已君以
梅姚售偽孔蔡謬悠妄云壁下之書猥有杭頭之字古文
一卷祇出西州小序百篇舊名北斗正謨攝誥歷黃序而
僅存月采豐刑邁赤眉而已燼乃或誤援伊訓滋元年正
月之疑強執周官推五服一朝之解譬之爭年鄭市本自
兩非議瓜瓞山良無一是是用翦除假託折衷羣淆步驟

五三錄目四七爲尚書義考未成成堯典一卷又以要聞
五際尚論四家毛傳孤行是觴源於牟妙鄭箋破字每毫
采於轅嬰莫不假聲注文以意逆志誠古訓之所式多識
之所資也雖其篇冠以序擇焉不精或云託諸西河或云
造諸東海然嗣衿貽玖何必欲色之音交扈羅鴛鴦爲陳
古之刺爲毛鄭詩考正四卷別爲詩補傳未成成周南召
南二卷君之入書局也西京客史夙善徐生東觀中文遂
分淹禮乃取忠甫識誤德明釋文殫求亥亥之差期復鴻
都之舊互相參檢頗有整齊削康成長衍之條退喪服廟
經之傳爲儀禮正誤一卷鄭斤粵罇之篇備遺事職穹蓋
星弓之教首列巾車九經九緯營國有方五溝五涂奠水

有則尋筵旣度遂知洛邑之朝圭禁未縣孰辨營邱之夕
以至肆懸舞甬五等琮璜槐里樽空椎成劍沒大夫嫁女
之器未必皆真單于賄漢之銘何嘗盡僞諶鑑之所畫績
梁聶之所更釐不有參稽將無競爽爲考工記圖二卷古
者冕服以祭弁服以朝祭則衣純朝則以布芾形連帶制
異於直方履色從裳次分於績繡周壇饗帝大裘降繁露
之華魯禘嫌王旒璪飾丹雘之祝等威昭焉文質備焉道
學起而儒林衰性理興而曲臺絕齊秦委武莫識稱名殷
夏圓章焉能考據湖增冰於積水示祭海於先河爲學禮
篇一卷冠其文集十卷之首且夫一陰一陽之爲道見仁
見知之爲性通於六籍之爲學辨於萬事之爲理謂理具

靈臺則師智者得謂學遺象罔則悟寂者先豈有畧窺語錄便詡知天解斥陽明卽稱希聖信洛黨之盡善疑孟氏之未醇其說空空其見小小蓋釋鄭君生質之訓誦周雅教木之箋所謂受中自天秉彝攸好孔提可按漢學非譌爲原善一卷孟子字義疏證三卷大學中庸補註各一卷君之學術此其大端歟景純有云爾雅者九流之津涉六藝之鈐鍵虎闡小學未束髮而知書豹鼠竒編不下席而觀古故辨言之樂對於三朝首基之文問於五始至於殊方別語絕代離詞皆轉注之指歸亦凡將之墜緒爲爾雅文字考十卷方言考證十三卷書敎有六最夥諧聲叔重無雙惟傳解字若乃部分平仄母別見溪官家恨狹羊戎

之所自爲天子聖哲梁武之所不信古人韻緩止屬椎輪
後世音繁實精引墨君審其清濁導以源流旁通反紐發
周沈之舊聞上協詩騷探顧江之新義爲聲韻考四卷聲
類表十卷

先生文集尚有轉語二十章及六書論三卷自序此二種遺稿未見於是辨韻之

餘留觀百氏研音之下雅愛三閭以爲娥臺訪女近窈窕
之遺聲湘水塞芳續榛苓之逸響叔師註而未詳辨招附
而不可核之漢志名從主人爲屈原賦注四卷自疇人分
散鄒大失居九章中落昧商高積矩之言八線西來竊師
氏旁要之算而耳聽下土穴見小儒不知五五之開方輒
薄九九之賤技哨壺斗五律管徑三元晦以之存疑季通
以之強說未知紀步何能讀宅柳之經未曉倨句何能治

上輿之記爲九章補圖一卷原象一卷古歷考二卷歷問

二卷昔趙商難禮先求五服之方景伯受詩卽涉七州之地君山川能說郡縣成圖鄒元故籍證其縣褫崑渤今流條其絡脈爲戴氏水經註四十卷水地記一卷直隸河渠書六十四卷嗚呼君之著書可謂博矣君之見道可謂深矣向使壽之以年行其所志下安輪於都尉授梯几於鴻臚雍宮未建命曹褒以定儀大子將成詔宋登而持節雖復辨卿訟闕公羊未必能明子駿移書逸禮難其置立而太山郡將北面稱師上蔡通侯西行受業則何湯旣貴轎車方賜於五更君上從遊錄牒庶多於萬計豈謂陰堂告禋圓石鐫名一經之寫定無年三歲之瓊瑰已夢清明卷

佚長封下馬之陵通德人亡不待嗟蛇之歲然而太元覆
詭終遇桓譚都養陳謨彌尊伏勝鄭鄉絕學倘千百載而
重興戴氏遺書於十三經其有補悲懷逝者延佇將來

王氏醫治序

孔廣森

語曰若金在鎔惟冶者之所鑄貢云三品見情之列居前國有六工築氏之齊執下所以激沈清濁甄類苦良蓋吏之有課史之有評詩之有品書之有斷方諸大冶厥義維鈞則我更生王君於是有醫治之作言夫鵝居既遠鯢壽斯希四節潛乖於冥造之初六鑿相攘於徹眇之後雖復桃弧春射天札猶多荆盾秋毆鼯噫詎少由是權輿百艸赭鞭奉軒后之威消息三停素女發明堂之訣入靈蘭之室卽受竒胲過長桑之舍方聞禁要冰臺三歲鏃刺九名乞錄籍於開陽駐顏暉於連石是以刑臣西上降綸玉而求方世子南征解綦瑜而採藥然而青囊委蛻卷軼丙丁

元晏淪漚經虛甲乙自餘楚賦鮮稱九折之良不遇涪翁
孰曉六微之技昔之視垣一方見心六孔長兄察色仲子
覘豪裏紺知生茲青知劇龍門濁浸回通關蟄之經駭穴
澄源內合支蘭之藏豈有循雞轉急握虎翻舒狀榆落而
非真期非英而罔驗帷中十指曾迷婦寺之殊壺子三淵
不辨權衡之氣斯診脈者失也遙傳帝問僅丸雀於茅蒐
閒採軍謠拯河魚於麥鞠黃環赤箭未錄桐君漆葉青蘄
略存樊氏而或倍偏枯之餌倖瞑眩之瘳壹媿母以爲君
謂烏頭而可帝必致以熱益熱以寒增寒心識分銖非其
能事治蠲湯液去之愈遠斯處劑者失也將謂上商少羽
會於六六之紀欽徵加宮判於五五之性則七元詭歷孰

司天其可憑八谿蘊深譬迎雲而未極相如痾病非皆鬱
作之時九門疔店何必容平之月玉機旦讀祗亦空文金
匱年荒已爲陳迹循環齡素石溜仍疎俯仰鉛黃膠飴莫
效斯泥古者失也晚有完素嗣以義烏損陽益陰墜離升
坎廢溫中之味先瀉下之法五分之熨奚施百灌之寒垂
殆嗟乎春煥者生之徒秋澆者殺之令故楊泉有言道家
尚冷醫家尚溫今輒反之使升明火化絕於君主之官洒
浙陰淫客於奇恒之府懸方肘後安望延齡納斧胷中將
無伐性斯見偏者失也王君仁者愛人學焉先覺自垂絳
鬢厭窺中古之書早悟華琳似飲上池之水若乃萬金良
藥九部奇經審吟咀於毫釐候樞闔於尺寸經過濟北便

識才人留滯交南倘逢仙令廣峨嵋之術祕欲託嬰巢拾
長沙之仆漏宣明孫絡徵其治案已驚掛虺之車推其神
功應寤援熊之夢且復濡烟橘井比事芝函岐區復逆之
詞和緩春秋之策意專信史之傳俞矯寓言之篇以及歲
稽四失周官之所殿月爲干軸梁皇之所嗤靡弗收羅於
此法戒品題備適流別洞該者矣猶恐末士膚受攻乎異
端襲高陽之紕紛昧河閒之結滯死如可作疑懷躍冶之
鳴生不同時尚有載金之悔是則辯囿何窮狂泉不竭存
其正論質諸古人

張舍人熱河集序

孔廣森

昔嚴夫子有言經有五涉其四州有九游其八猶以聽覽所及不逾白阜之封吟翰所被未罄黃坤之域亦有落梅驄馬迢遙隴上之章低草牛羊敕勒軍中之句饒歌白鼻樂府黃塵過青冢而怨琵琶弭白檀而思鼙鼓莫不叩響風疏聯解雲委然而悲笳九月塞草前衰橫笛三臺關柳易折羈寄之情長感槩之興短噍殺之音多藻績之詞少也瘦銅舍人負沈宋之才游常楊之職紫荷奉棗紅藥當階曉趨丹屏夕拜青瑣直鸞闈而端牘對雜樹而流唱固嘗倚馬七紙握蛇百篇人誦穆如之風世傳蔚爾之文矣熱河者神明界局地貳陪京里其道路既遠百郡之外尊

其邑居仍當五都之勝

國家陋甘泉於漢氏侈仁壽於隋年以爲堯皇游豫必作
宮於成陽周王考卜亦朝步於豐水每中郢履節清明告
風乃睠北顧此焉清暑時則舍人滿歲灌謁往覲交閭考
且首塗兼辰戒道房雲在空箕風動衣天日姓晏宇宙輝
朗仰矚

宸居之麗俯察區陬之廓得不揄揚舞詠舐和烟墨者乎
若乃層巘隱天長波帶地黃靈訪道之山翠媿沈玉之潛
舍人極覽津委旁綜載籍徵鮑邱之湮流問濡水之故瀆
博望之槎萬里探溯崑源太冲之賦三都參稽方志是則
縹囊一詠卽注桑欽之經墨林五言可備闕駟之記且夫

稍雲之斨半柯自奇衝霜之松寸莖斯見讀是編者其可
以知舍人之詩也已

閩秀王采薇長離閣詩集序

孔廣森

昔靜女之三章取彤管焉被壽人於笙磬非無都荔之詞
縟列宿於羲娥不廢葦杭之怨葛山少婦執越布以歌勞
柘館貞嬪裂齊紈而歎逝書之硯札盡金屋之奇才選入
江東卽玉臺之新詠女子善懷香奩尚已則有通華胃望
淑慎閨儀南國新人東家舊姓十三織素二七裁衣漱澗
藝於瓜年剡芳名於茗玉長言婉轉女師德象之篇好句
流連吉甫清風之誦前身蓮葉不踐陳泥他日椒花必多
新製况復鴛鴦左顧孔雀南飛歸小婦之高堂調弦錦瑟
識上頭之夫媚絡轡青絲鑪熏夕而共香鏡照塵而同影
司空博物本兒女之多情內史工書作夫人之弟子斯又

王郎天壤愧此多能居士桑榆羨其嘉耦者也若夫紅羅
帳揜朱鳥窗開初成墮馬之妝自服游龍之彩繡餘茵蒼
倦卽停鍼製就茱萸織常當戶莫不語緣情靡感與候遷
牙管一雙金釭二等雪凝謝苑擬飛絮於風前日出秦樓
歌條桑於陌上至如雙聲讀曲十索名題陽羨新茶紬書
鬪罷南安早栗故事疏來香沈水而郎歌繭懸絲而妾和
西陵松柏便結同心北地焉支彌增善味香囊叩叩是繁
掾之定情雜珮珊珊有鄭姬之警夜奚止爲歡玉女爭投
百箭之驍射雉珠皐始見三年之笑又如草生南浦梅下
鹵洲贈子將離呼卿小別菴藍盈匊指五日以爲期蕭艾
懷人比三秋而更遠遺簪紹繚破鏡連環書檢六張文周

四角蘭成集上曾裁寄婦之書徐淑詩中不少望夫之什
亦或少君歸里對挽鹿車侯光去吳仍偕鴻婦漢水之平
塗七百江陵之遠道千三春嶂青螺來發雙蛾之色秋波
白鷺迴成九曲之珠是則七邑東征曹家善賦百泉舟楫
衛女寫憂抑亦詩發乎情情生於文者與然而蓉生江上
杏倚雲邊未免牢愁誰能理遣重以諸姬適擲永歎肥泉
季姊歸郇先零弱歲芝焚易感蕙質何堪幾日飛龍祇愁
藥店數聲別鶴忽上琴絲簾塵則榻冷琉璃吟筆則牀空
翡翠左思嬌女能無失母之悲班固佳甥應有問神之作
於是子荆改服文度多傷求故劍於箱簾綴遺翰於鏡檻
紅桃麗字遂書河北之箋白蠟妍辭徧識閩中之媛而或

者謂結璘有藥弄玉疑仙三髻雲鬟蓬壺已隔層波羅
洛浦仍逢倘作異聞傳諸好事則綢繆贈荅將皆戴勝之
瑤觴宛轉音聲盡入彩鸞之唐韻小傳云亡後于世上致

居切利東宮掌
上界書三百架

元武宗論

孔廣森

臣讀元史至於武宗以後家難疊興數年之間八更其主
嗚呼天之亾元久矣蓋百里之侮闕於兄弟干戈之憂動
於蕭牆二世帝秦咸阿由其煬燼八王柄晉伊洛所以榛
曠自古爲然其跡可按也武宗疏壤子於駝紐之封進太
弟於龍樓之位亦可謂難能已而仁宗遠昧遵海之風近
忘祝食之德與夷猶在詔羣臣而奉馮季子雖賢奉王僚
而心憾遂使南坡一變鉞刃交於帷宮北地諸藩訛鼎亂
於牒屬始則私其神器卒乃戕其愛子悲夫旣而泰定革
緒曲律遺儲五遷之運復歸陽甲三讓之事將佇橫庚而
又謀之不類兆其必爭使者南北交馳幹獵之徵天王東

西待問乾祭之歎內有與主外有長君申孫射而桓已當
齊菟裘營而隱猶攝魯豈有襄鐘既賂髡頑能不自疑楚
璧可干訾敖信其久據者哉昔永平雜席趙熹橫劔鄢陵
問璽賈逵正色所以慎名於玉几之辰循卞於綴衣之側
故其臣有定策總已之功而其君無舉棊勝偶之患彼元
人者方將以馬上治天下用法律爲詩書不觀於前簡之
中失不營於來軫之逆順年年坐靜仍促烏號歲歲上都
易危魚服積其禍敗乃至於此不然則至元後元兄子猶
子謂宜崇明考以讓王之媿假文宗以乘石之名善繼人
志諱內大惡何至幽厲之主流戶外而忽諸長信之尊誓
隧中而不恤豈非四維滅亡六典缺絕之效與嗟乎國之

將也非一手一足之烈也亂之既生非一朝一夕之故也
流濁者澄其源影枉者正其表職此之咎武宗基之已向
使至大御宸周王監國立適立長人謀鬼謀終鮮叔武捉
髮之嫌兼絕永熙斧燭之凱雖或順孫不肖繼體宜君而
張許諸賢猶可同日而治世成遺澤必不三傳而斬明矣
是以古之王者因時以制禮慮難以立經承顧九世非襲
若水之降居薦益七年不慕陽城之謳獄一生一及廢質
家親親之法三昭三穆明文家貴貴之典所謂設妃如席
樹子如社重齒路之防定逐鹿之分消闕競於未萌期憲
章於可久不幸中葉震業大寶陸沈猶當上鑒夷吾唯卜
貳園下徵靈武卽禪宗儲則英景之覺肅愍之誅不且可

以免乎故曰春秋之義先大一統君而二統未有不亂者也

書烏巖圖後

孔廣森

李畏吾舍人示廣森烏巖之圖而告曰余隨牒中銓須畱
上國乾蔭旣遠離嗟彌構輒復西風菰菜相憶巖居南陔
蘭草有懷烏哺圖所由名吾聞其語嗚呼仕非爲貧士各
有志或三日而中臺有十年而東觀傅丁方貴朱丹嘲揚
子之車張甲能先黃白滯王修之治而況澎侯馬廐舊館
賢人兩相車茵新嗔小吏投光祿之版恥執公儀沃令尹
之卮請辭侍飯古人之事則旣然已舍人慕嗜退之風秉
樂潛之志孰長伯而可客非文開而何諧空成華露之吟
獨後景風之典是以葡萄未遺柶棘悲來桑中之宦三年
桃子之心五化斯圖也其以平子應閒夏侯抵疑而寓問

答於鉛黃託家園於油素者乎昔有誦辭家之什解章帶
而情移捧府檄之文入衡廬而色喜亦有叔褒賣筥離下
傳恭巨孝推轅傭中將母不以三珪忘其負米不以萬鍾
易其啜粟者舍人於此必有所處也他日北山之北東海
之東賦就枯魚兆成植鶴閉關掃軌耕陌懷書有棟依桑
無筵折芰丈人安坐豎子提壺叔慈應門長文載箬爲君
歌曰衣與繆與不女聊與君能養志樂何求與

書周長生先生畫像贊後

孔廣森

右明逸民徐枋所爲周長生先生像贊也先生之孫屬廣
森書以小篆將鑄諸賜祠廣森聞之紀侯大去春秋善九
世之警豫郡先賢畫像厲百城之俗是以屬參之行擊則
延閣府之也訓品之範樹則鑄金儀之也昔明祚百六之
衰拯皇元二之會薰胥柄國推燥暘封藏冰愆七月之時
飛雹沴正陽之氣故御史忠毅公青規爭引白簡繩彈以
爲魯申勤雨先遠郭都易京陳災唯歸石顯貝瑗獨坐恐
危鐘下之儲王聖交通必釁壽房之兆遂使銀璫戴目金
版寒心寘嚴棘於南冠讞飲章於北寺火中饌斧生殘戴
就之尸殿上練囊死辨杜根之目先生奔扶棺絮痛哭灰

釘免譴代郵方逋公負十三孤嗣變名姓而當壚甘首屯
歌道闖門而賣餅卒乃刺草伏闕噬血書衣君門九重臣
心一寸訟彼首惡滌我沉寃不惕於黑頭爰立之威不奪
於白水真人之賄以視陳掾都亭之下蘇卿芻膾之中發
憤枕戈甘心推刃者其所成就何如哉然後需頭再奏頓
首申祈公叔木之有言請褒文字吳溫舒之論枉乞謚威
侯維時莊烈帝念忠毅公首排客魏發履霜冰至之幾禍
較左楊慘乘火泉寒之始旌大名於讀誅增軌級於書銘
雒邑弦歌舊思王令齊民叢社詔祀樂公今之賜祠所由
立也其後彤雲東聚青蓋南浮謳歌之運已歸虞徵士之
官仍繫晉是則巨游相表堪圖益都之間文德遺蹤卽配

宣明之食緯曰求忠臣必於孝子之門斯其信與

興朝景翼羅圖不遷郊鼎名耆受凡才子褰裳而在三之
義彌敦懷二之臣必斥絲言賁往竹史昭來嘉忠毅之敷
猷蠲文章之禁忌然則猶雲令主不兵霍虎之辭河濟頑
民且錫將軍之葬潛德光於此日圭爲永於其鄉矣又況
舊冢帛素異代丹青鬚髮平生冠裳不改頌黃瓊之貌作
者中郎寫延篤之形附諸正則墉垣烈士似遊武氏之堂
軒牖前良何必竟陵之室後有觀者可以興焉

林編修誄

孔廣森

維乾隆丙申秋九月初六日

清故承德郎翰林編修侯官林君卒嗚呼哀哉昔亦靈佐
命遠疏平棘之封綠錯傳經高議石渠之上國乘光於傾
聞家牒襲於綿世父諱其茂山陰縣知縣桃街清禁棠政
流美君以支子爲叔父嗣禮也小男彭祖繼張侯之封後
子伏恭世齊詩之學君諱澍蕃字子宣羈貫夙成岐嶷早
異馬客卿六歲酬賓黃子炎七齡對日百畝垂蔭擢潭根
之初莖九里被潤導靈河之枝持中學心聽上智目成稷
嗣槩人頴川涉獵纒聚百氏之說斧藻六朝之文旣志勵
緯蕭亦藝勤緝柳歲乙酉鄉舉中式辛卯成進士廣森與

同榜焉君益逾方朔獻書之歲僕初履叔皮著論之年三齒已長執敬鴈行六載同官趨陪鵷序因共朝夕逮觀終始君動爲善煉禮用闕郵四徹中繩三雜若矩言有壇宇而未嘗臧否於人行有坊表而未嘗踳趾爲義嗟乎豈無百驚誇誇者斯希亦有五錐銛銛者必控偶影難獨衆和易同亭伯階高日倒通侯之履君卿門小雨霑從者之衣而君恥彼造緇戒于奪赤翹材之館自絕芝帷修刺之家未餐蕙葉所謂招之不來麾之不去當求之於古人鮮遇之於今日者也甲午秋試奉

詔爲浙江副考官一封軺傳八月輶軒回選儒臣誰差多士君提衡允望砥節首公竿牘不行苞苴無謁耕柱游楚

遺金必卻正禮在梁餉錢爲怒是以陸賈南使未有千金之裝貢禹西征先賣百畝之產介性至己端操異己君室如懸磬家唯祗裊董少平之敝車揚子雲之儋石貧豈非病憂能傷人重以洗馬神清侍中體弱自分職三閣典司四部編削旣勤員程無曠心深力淺簪短帶長遂嬰戚於

伊年卒沈懔於美疢三門九宅兼違築蓋之凶

林君寓宅於九宮法

開絕命門同年蔣考功嘗言之君不信也

五苦六辛莫規劇易之效至於眠繭

啟足之際屬紕聽息之辰清明在躬平度無改發言不及於先令內顧靡戀於妻子死生有命不其達歟然而少婦零青高堂戴白遺孤在腹難卜爲熊貳女扶牀未占射雀中郎有女雖家緒之可傳當戶生陵庶將軍之有後情瀾

不竭遺恨終多温序死而魂欲歸苟偃沒而目猶視嗚呼
哀哉廣森與君居嘗連境行亦離載志協壘箴言投水石
三年之字未滅於裏喪九言之贈猶存於巾篋而永辭官
牒遽執鬼中獲人凶而輟斤鍾子逝而息引寢門之哭於
禮斯宜宿草之慟非子誰爲况君本羈孤柩將歸塋丹旒
一去白雲千里寄縑二匹空慕於往哲過車三步有待於
他年尤離合之殊感朋友之極艱也禮諡以易名諫以表
行爵非有諡諫何作焉然文中貞節青簡有私諡之法孝
若仲武黃門多述哀之詞敢援斯義而爲之諫曰

金飈北轉玉衡西遷小榆兆節長柳占愆芳薰委秀朗璞
摧堅嗟我良執值此週年嗚呼哀哉貧瘁爾躬官勞爾心

南瞻孝永北出憂深偏枯倍劑憊冥何斟懷才恒化齋志
湮沈嗚呼哀哉美製拳華殊裁韞櫝一曙云亾十典誰續
聽笛嵇鄰嗚琴阮曲纏杖含悲案寮隕哭嗚呼哀哉牀塵
鼠跡庭絕驢嗚誼親羊左痛感殤彭仰念民母旁瞻俊兄
魂歸閩海形滯燕城嗚呼哀哉道布垂筵罔車在砌京兆
新阡西州舊第遺像竒冥精靈髣髴楚挽流聲蘭交洵涕
嗚呼哀哉存亾隔世哀樂中年孰愚而壽或天而賢天道
如此予復何言子宜逝矣逝矣子宜嗚呼哀哉

林氏子哀辭

孔廣森

子友林編修亡後匝月而其子永健生生二十四日而天
嗚呼鄭小同之紹業望絕今辰南孺子之生男悲深昔事
林君學成士範行爲世表不永其年復替其後天道無知
斯非信歟方其室中飛練門左張弧庭角殊凡覃許載路
謂宜枌榆得銑桑樹藏鑲辨楊梅於鞞佩之年擬榛戟於
瑯車之歲豈謂民棺遽歛金瓠同嗟違寡母於緇袍從嚴
君於泉穴二旬嬰鬼未識軒渠三日咳名僮書赴告悲夫
是子弱喪誰還羸博之封有女愁遺空銘項伯之槨以是
思哀哀可知已乃爲辭曰

君何隔兮人世長太息兮人事既永睽兮素交復短折兮

遺嗣前悲兮未緝後感兮仍集屑涕兮萑蘭摧懷兮於邑
福兮禍所因喜兮憂爲鄰名鄭孫兮丁卯瘞潘子兮甲辰
嗟生命兮何促曾未更兮晦朔殤易月兮有盡哀終古兮
相續韞緘兮委階營魂兮弱骸昨喧泣兮猶聞今雍樹兮
長乖謂苗生兮不秀謂蘭茁兮靡茂石樓兮少女空城兮
寡婦風泠泠兮襲帷雪濂濂兮承雷曾積善兮非慶終理
冥冥兮不可窮呼三閻兮問九重慟何爲兮萃爾躬

大清防護昭陵之碑

孫星衍

夫如堂者密寔惟帝之圃時積高曰雍乃神明之冢舍是以尊盧虛壠尚彷彿於藍田西海衣冠必封崇於上郡何況龍蟠大壑比鄗聚之聲靈天命元宮繼長陵之功烈者哉醜泉縣西北六十里九嶷山唐太宗文皇帝昭陵之所在也帝提劍乘天握圖出震驅除吞噬彈壓殷齊白魚赤帝之祥版泉丹水之蹟讓黼展而肅五日之禮寓斧斨而正二叔之辜浮纒不足效其文斷鼈不足媿其武帝系之所傳史牒之所頌盡美又善無得而稱焉原其終始靡聞歸藏乃若山陵有彰聖哲且夫雄畧之主必旁皇乎上仙蓋代之氣每綢繆於沒世水衡灌地將爲江河玉桃服尸

思畢天地故以七十餘萬驪山穿治之徒一萬六千茂陵
大徙之戶帝則深遵節約厪鑿嗟峨似委宛之桐棺擬穀
林之通樹萬乘之貴悟旨莊周獨決之明徵言季札克終
后志遂下王言侍衛減於常儀瓦木止於形具此則帝之
儉也藏弓烹狗志士因而拊心長頸烏喙哲人於焉長往
子胥抉目於吳闕彭越覆醢於淮南未嘗不掩浸潤之明
損豁達之度帝則我言嫵媚推心置腹之誠袒見瘡痍丈
夫意氣之語暨乎鼎湖得去閔墮地之空號藥水和存想
張朝而再見金枝玉葉左武右文前部鼓吹東園祕器祈
連之冢亘馳道以如山鼉虬之文蔽元宮而似壘此又帝
之仁也兵者凶事不得已而用之守在四裔將羈縻而勿

絕然奇肱之車飛而偶至長臂之服通而復迷帝則薄伐
之勇係馘於明堂畏懷之徒輸誠於身後至使酋豪謝罪
慕濺血於墳沙蕃長歸朝鬪圖形於元闕拜官尚主天下
一家椎髮雕題駿奔左右此又帝之大也昔者宣尼遺訓
古墓無墳漢臣陳言南山有隙亡羊之牧歛誤入於三泉
踞虎之邱驟見傷於敵國帝則流連翰墨眷惜鍾王以堯
典之同棺當佳城之銘椁卒令沙邱之字勢怵於登堂寶
鼎之埏力窮於發弩嗟爾後世似有先知倒我衣裳詒之
繭紙此又帝之智也若乃宣室之問不信無徵墨翟之言
將聞豈見鬼雄非毅魂氣何之楚平一去被辱于仇鞭武
皇見形憤心於磨劍帝則歸復於土陟降在天呼嘯若瑾

之神叱咤投壺之電黑雲閃野邊妖寇於咸陽黃旗立空
禦賊軍於華澤皇堂奏異血汗如神祖龍無所用其驅蚩
尤不足比其縱此又帝之靈也帝緝熙之德不懈於生存
服畏之思彌光於奕祀故能莫不朽之基業享絕代之明
禋置廟設祀建隆開寶之遺陵戶豐碑洪武崇禎之蹟我
國家光宅八表懷柔百神屢致馨香頻加守護使星夜出
映園寢之神光燄火朝輝雜封中之雲氣沅守官關隴案
部池陽瞻拜神宮周游墓道其山也北據寒門之坂南帶
甘泉之流右睨溫秀之峯左眺樵穫之藪巖巒巖嶽薛三巖
角其雄名隘道盤紆九疑爭其遠勢非烟非霧立而望之
鬱鬱葱葱佳哉氣也而風高壤裂石室摧基地阻荆生陰

堂絕棧樵蘇下上會無百步之防鏹亩侵陵或至諸臣之
冢穹碑半剝翁仲全傾因以乾隆四十二年檄築圍牆三
十餘丈大書瓦屑豈分邈隸之奇列植松楸芟舍甘棠之
敬旋因入覲

上適疇咨始知聰明之德久契乎

聖懷平成之歡待格乎神漠沅再之官又踰五稔兼營寺
宇特用陵租知縣蔣君能平其政寔任厥勞恐古墓之爲
田考陪陵於往牘紀其名位復立貞珉仰體

皇謨光昭來者將與會稽窆石共磨滅于苗山風后神堆
謝浮沉於黃水游心隨武九原可作之臣佇想非熊五世
歸周之墓風雲如會陵谷長存豈止狄山之紀久迷視肉

之方濟陰之祠但獲龍魚之瑞云爾

國子監生洪先生妻蔣氏合葬壙誌 孫星衍

乾隆四十三年十二月五日吾友洪禮吉奉其母孺人蔣氏柩合葬於尊甫午峯先生之墓季武子之成寢不嫌非古趙臺卿之立石遂其生平始屬其友爲文識之禮也先生諱翹字午峯武進人孺人其同里也洪先世故居徽州先生父豐旅君始爲秦贅竟保趙孤好義以破其家趨仁而美吾里有華望焉明德焉先生既有父風亦騰英氣粼粼出石之水落落在松之颯先是孺人父嶠寢君品藻人物偃蹇淑速其見先生如伯喈之傾仲宣尼公之締子芝焉旣而第五窮居百年偕隱蓬蒿之琴夜引甌鬲之蟄朝生先生方跌宕文采友于昆季一尺之布必推李元之衣

三年之券親折田嘗之手洎乎宣尼告夢堯典同棺會稽之厄少微隕而誰爭彭城之喪老父弔而莫識顯顯乎有古之節概者也孺人罹此屯災終其禮教勉卷施之不死泣飛蓬而無顏礪門子之陵華御遺金於繩華能通喪禮便守孺悲親授漢書獨師孟博至夫髮髻修容乾菴示惠三德七誠之篇秋菊春椒之誦固以昭此大節後彼餘行方先生之卒也鴟室斯搖馬鬣未卜踰月之禮不成五父之殯斯愴孺人辛勤墓檀莫茲兆窳甫覲有見之子奄當不待之年日月有時歸於其室林宗之墓執紼而會者干延陵之封好禮而覲者百星衍慙彥升之無文信有道之不愧嗚呼哀哉搏搏之士矐矐之暉然膏永閉移帳無回

神驚沙起啼冷禽來光光員石識此女士其陵其谷何年
何世松楸露盡非無染淚之株溟郭塵揚祇有生金之字
先生生康熙五十三年三月十日卒以乾隆十四年七月
二十四日春秋三十有八孺人生康熙五十三年五月二
十日卒以乾隆四十一年十月二十四日春秋六十有三

祭錢大令文

大令名汝器知武功卒于任自言
富爲神汾河余適汾州爲文祭之

孫星衍

昔者巨卿死友厥有素車之馳子文酒徒無損成神之骨
恭聞故實不謂逢君曩以燕游妨君小節圍花作縣傾穴
移金桃分子坂之筵手進襄成之袖一日則古疑無死干
秋則魂猶樂斯無何越人大去淒涼山木之心向生重來
淚墮山陽之笛宛其入室喪予平生然而文翁之知亡日
燕飲如常子通之令太山妻孥有夢雪旗畫接鳧鳥宵分
彼汾一曲如玉娛戲之方姑山藐然神人翔泊之所僕後
車日載五嶽游來渡妬婦之津過臺駘之廟所思予美忽
藉君靈邂逅壺觴徘徊祠宇方冀靈衣羽葆損爾尊嚴散

髻斜簪助予跌宕嗚呼參差誰思猶揚楚江之靈弦歌赴
節尚涌舒姑之浪我懷如夢君豈忘心倚玉何時模金宛
在況復愁加岐路悲甚生離靡蕪感再逢之難桃梗被漂
流之笑罔兩間影慙先後之無期丹朱馮身庶歡娛之有
託澆君壘碓保此嬋媛知我幽冥庶其歆饗

國子監生趙君妻金氏誄

孫星衍

年月日吾友趙億孫盾其妻金孺人于黃塘先塋丙舍之側屬誄于星衍且曰古者銘誄皆內之壙而權盾亦有誌焉君嘗與余同悼文必有至者星衍不獲辭孺人諱學南浙江桐鄉人也生而淵令長而麗則于是金氏素封厥嗣未誕鄭夢則一蘭方徵崔后則孤星始曜宜乎嬌愛損此清衷乃孺人則聞蟲弄機鬪華學繡晞其鬢澤耀金翠而弗勝瞻其容止謝珩璜而彌令媚人能事成臻妙焉旣而斥粧于歸移孝及所玉繖照于中閨惠風盈于嫺黨趙故名臣孫食不兼膳衣不重殺孺人親率操作無斃沔澗霧宵霜晨厥災由槩匪惟聽從殆亦天性又其明識足抗前

竅億孫之與從舅俱繼大宗也嗣同宏微歸殊仲慎而乃
田逾百雙取方一介廉非爭于糟食產寔讓以螟負孺人
慨然力成斯志又嘗以狷介故遊京師屢不第孺人曰達
亦榮親而在以隨俗非顯揚也爲誦白華之卒章怡然而
釋詩稱無非易曰闕觀循斯懿烈固已加已元穹靡忱芳
淑遠謝遘茲沈痼烝離寒暑猶復並懼懷衛之水尋醫望
齊之亭夢妖則瓊瑰不收肌冷而潛英已逝燕會遠送雉
竟孤飛葛覃之家生還蒺藜之室喪反烏乎哀哉孺人行
納衷和饋分周賑奄厄之日媼婢擗標餘哀在人日月不
泯而億孫以心喪不娶之制達禮經三年之義子真好古
始有廬杖之文曾參未育益違故劔之志僕心如雁警豈

埃聞弦月值鴉賁同傷不臘

先妻亦以是月卒

含筆隕涕誄之云

爾

舜華而收荃芳而脆痛矣之子溢焉不待之子之孕如璋
如珠撲貞其心黼紉其軀既秉瑜珥亦習鍼纒宁月儀娥
揚風折姆作嬪君子接跗承華睇涕無詖佩悅不譁鐙紅
紗閨杵響霜屋盥先雞興績後烏宿君子被放厲爾幽素
君子好義助爾良譽突梯匪榮金籬豈顧展如之媛彌日
不勤諱疾私室侍疴寢門簞褥不啟墓萱斯親姑獲其祚
已罹其屯素商驚離檜楫朝返告師猶糲慰母仍飯長眉
煙斜淚目波散何圖沈縣因此華莞帶辭園于要軀兮藥
謝靈于胷肝驚黃蛾之拂燭兮怯青蟲之重襲索銅照兮

一覽涕衣箠而成斑扶嬰茹歎蒙被訣語墜塵臨飈翳魄
待曙玉寒烟生雲停神舉烏乎哀哉委質大莫兮毀妍窮
局嗟爽靈之不揚兮怨翟言之非誠攤殘夢而攬影兮步
虛房而象聲淵淵君子秉禮終制其知其否孰髣髴律
旣變兮服不存綴彤管兮招離魂彼嚴周之心絕兮乃矯
辭而鼓盆誠哀樂之已忘兮奚饒饒而煩言元廬旣卜窮
紀卽窆慕思回旌怨響崩雪烏乎哀哉鬱鬱銘石闕茲敦
邱衣新纘落膏久銓幽如何親暱弗援弗留傷同世而異
氣兮春非春而秋非秋

洪節母誄

孫星衍

夫煒晉無不朽之椒則期頤壽矣中閨乏飛華之烈而禕翟榮矣故蘭芬于委灰无假冥靈之年松貞乎嚴沍不晞寒谷之律若乃投畚辟纊之抱卻符待姆之貞翼此坤德由其闕觀豈可使陰律罷揚光靈不屬餘椒旣衰前冊疑誣不其惜乎孺人王華早映觚竒幼操動合經曲言成軌則年二十一歸午峯先生家造遞衣之貧室無賃廡之隘布裳而前簪飾旣斥先生射矢有志斷機非箴高文通坐視流麥謝彥貞傾身交結懷哉君子二人同心矣昊天不忱漂搖其室旣罹烹雌之別遽覲在已之災私謚闔棺邪衾入殯翦顏亾生則笄總莫恃對影忽絕而孤嬰旣藐實

乃伐蕙於背樹茶於心歲華端憂室有不黔之突廊成燼
落隅亾不卹之緯旣而市居數易土壠遂成窆棺要離之
殉屬子李杜之後蓋二十五年於茲寒泉不流悲谷謝景
以乾隆四十一年十一月二十六日卒於內寢烏乎哀哉
一絕之袂無救旣搯之臂在負之米不盈一日之奠穉存
至性過禮喪幾不勝星衍旣辱拜母之知不辭誄長之僭
云爾誄曰

俗非嚴禮時亦濶古光光賢母有此心苦相夫成義翼子
令名含貞斯芳致身匪榮織聲在樞誦聲在牖兒方焮掌
母亦龜手明明三千世無能知禍從小宗壘而服總衣裳
在笥戒女副尺截肉斷葱方在是式粲粲處子負書以游

不營不欲日宏而修范達來初張邵別久爲爾醞酒視其
所友清切舊幕里鄰司徒襟分夢投雞號舞俱傷哉北門
出而殷殷始嚙其指遂馳而魂魄之茫茫集此空戶帷緹
以總扉黝易聖靈衣旣設髻麻來歸瞻霜有傷涉波無知
子刪蓼莪我覲蒙楚星衍時甫喪妻灑零冰苦雪泗血土倚廬沉
沉白日刺目有林有風萃此宵服志寔普臆喪无毀身厲
汝節行母之斤斤

關中金石記跋

孫星衍

雍涼之域寔曰神臯吉金樂石之所萃也爾乃竹書紀異
昆侖樹王母之眉韓非著書華嶽勒天神之字休與藐哉
其詳軼矣若其列侯尸祀銘業乎奇器漢將揚武紀威乎
絕域西京崇秩望之儀蜀魏盛開鑿之蹟固亦有焉是以
岐陽石鼓厥貢於上京裴岑紀功揚光干昭代暨乎唐葉
作都渭陽宮室陵寢此焉是集移山壽績壓岫標奇巖爨
負文而疑神螭虬挾篆而欵走亦越宋元彌工題唱鐫名
百仞之翠沈字九回之淵莫不比重昆瓊方珍華玉自是
厥後廢興忽然頽坻晝落則偉額潛埋野燎宵飛則貞跡
渙碎承平以來屢居愈阜削員珉而代甃臥方闕以泊絛

或乃因文昌之小辭劇皇家之逸製者古之士蓋其閑矣
隱顯之候豈其恒歟今陝西巡撫畢公江左之望蔚矣儒
風漢庭之才衰然舉首逮乎爲政其學益敦開府乎咸林
攝節乎涼肅外傳有云夕而序業周公之美讀書百篇公
其體之斯爲大矣時則鄭白之沃互有泛塞公廝渠所及
則有隋便子谷造象得干長安唐爾朱達墓碣得干郟陽
朱孝誠碑得干三原臨洮之垣亘以河朔公案部所次則
有唐姜行本勒石得干塞外梁折刺史嗣祚碑得干府谷
寶室寺鐘銘得干鄜州漢鄒君開道石刻魏李苞題名得
干褒城公又奏修嶽祀而華陰廟題名及唐華山銘始出
焉公釋奠學校而開成石經及儒學碑林復立焉自餘創

見多後哲之未窺前賢之未錄公受之以藏是云敦素獲
之有道乃惟賢勞其知者曰可以觀政矣重光之歲月移
且相武彙有緘嘉禾告瑞公始從容晨暮校理舊文考厥
異同編諸韋冊且夫歐趙之書徒訂其條目洪都之著弟
詳其年代公証古之學奄有征南博聞之才通知荀勗此
之造述力越前修談經則馬鄭之微辨字則楊杜之正論
史則知幾之邃察地則道元之神旁及九章淵通內典承
天譜系之學神珙字母之傳固已奪安石之碎金驚君苗
以焚硯君子多乎于公末也公既理其打本藏諸名山刊
其嘉言詒之來學謬承校錄畧悉源流若公惠政之列
國勲之章方與往刻共不朽焉非所及也

重修鄭公祠碑

阮元

元嘗博綜遺經仰述往哲行藏契乎孔顏微言紹乎游夏則漢大司農高密鄭公其人矣公當炎祚陵夷清流沉錮泊然抱道邃情墳典却謝車服隱德彌修所學易書詩禮春秋論語孝經箋注百餘萬言石渠會議無以逮其詳貫扶風教授不足擬其旨趨又嘗比核算數甄極絃緯兩京學術用集大成天下師法久而彌篤固不以齊魯域焉今皇帝惇崇儒術表章經學

纂定三禮義疏多采鄭說是以悔內學人翕然依嚮言性天道無敢騁其虛悟禮度書文靡不通其原本庶幾孔壁簡策得以訓言儒生耳目未傷瞽瞍被公之教斯爲至矣

公墓祠在高密縣西北濰水東岸四牡結轡于鄭公之鄉
高車竝軌于通德之門是北海太守孔文舉所開建也元
以視學泣止斯土展省祠墓圯隗實甚宰木不捍于樵采
驚沙坐見其飛積趙商漢碑未傳于著錄承節墓碣埋蝕
于泥土遂乃倡搢紳之夙願鳩木石之工材始于乾隆五
十九年冬十月至六十年秋八月成掘沙百尺門防易以
東向植樹四垣饗堂翼其南榮聽事啟楹則長吏齋祀所
止息也茅廬栖畎則賢裔耕讀便蠲除也復將擢彼秀異
用請于

朝以奉登俎世世勿絕庶使大儒之祀不致忽諸之歎治
經之士無歉仰止之懷居斯鄉者績學砥行感憤而起不

益偉與爰樹樂石表德刊銘其辭曰

秦燄滅經漢學證聖於鏤鄭公禮堂寫定罔括衆典束修
懿行學徒知歸異說反正子雍多毀仲翔善諍日月豈踰
藐彼敏政礪鼻之旁淮流湯湯草街有帶沙走無囊林薄
新雉蔭彼墜牆廟貌聿崇祀事孔明長白之領別啟賢堂
粵惟茲土司農之鄉

蘭亭秋禊詩序

阮元

在昔典午中移啟江東之雲岫瑯琊南徙持吳會之風流
山林之祕競呈觴詠之情咸盛雖悟老易之旨猶切彭殤
之悲豈非神州不復易興陸沈之歎中年已往莫釋哀樂
之懷鍾情既深發筆斯暢是以林表孤亭結山陰之幽契
定武片石傳永和之逸軌矣元以嘉慶二年八月上巳按
部於越嘉賓在坐簿領既徹游情共馳再揚曲水之波展
修秋禊之禮浴沂湖典本無間于春風采蘭賦詩寔有異
于溱水是時清風未戒白雲午晴幽谷屢轉重山爭峻發
崇巖之桂氣起秀麓之松嵐迴谿接步緬陳迹于古人爽
籟入懷屬高情于天表夫倦心既往者撫韶景而亦悲撰

志詠歸者臨蕭節而彌適況今

朝野殷闐敬修名教吾輩遊歷皆在壯年白駒未繫動空
谷之雕輪旅雁羣飛集江湖之素羽振翰無采雖愧元長
之才侍宴承

恩曾效廣微之對良會已洽清吟紛來內錄賓客戚黨之
詩外納僚屬生徒所詠凡有作者皆著于篇

四六叢話後序

阮元

昔考工有言青與白謂之文赤與白謂之章良以言必齊
偕事歸鏤繪天經錯以地緯陰偶繼夫陽奇故虞廷采色
臣鄰施其瓌火文王壽考詩人美其追琢以質雜文尚曰
彬彬以文被質乃稱穢穢文之與質從可分矣懿夫人文
大著肇始六經典墳邱索無非體要之辭禮樂詩書悉著
立誠之訓商瞿觀象於文言邱明振藻於簡策莫不訓辭
爾雅音韻相諧至於命成潤色禮舉多文仰止尼山益知
宗旨使其文章正體質實無華是犬羊虎豹翻追棘子之
談黼黻青黃見斥莊生之論也周末諸子奮興百家竝騖
老莊傳清淨之旨孟荀析善惡之端商韓刑名呂劉雜體

若斯之類派別子家所謂以立意爲宗不以能文爲本者也至於縱橫極於戰國春秋紀於楚漢馬班創體陳范希蹤是爲史家重於序事所謂傳之簡牘而事異篇章者也夫以子若彼以史若此方之篇翰實有不同是惟楚國多才靈均特起賦繼孫卿之後詞開宋玉之先隱耀深華驚采絕豔故聖經賢傳六藝於此分途文苑詞林萬世咸歸圍範矣泊夫賈生枚叔竝轡漢初相如子雲聯鑣西蜀中興以後文雅尤多孟堅季長之倫平子敬通之輩綜兩京文賦諸家莫不洞穴經史鑽研六書耀采騰文駢音麗字故雕蟲繡悅擬經者雖改修塗月露風雲變本者妄執笑柄建安七子才調輩與二祖陳王亦儲盛藻握徑寸之靈

珠享千金於荆玉至於三張二陸太冲景純之徒派雖弱
於當塗音尚聞夫正始焉文通希範并具才思彥升休文
肇開聲韻輕重之和擬諸金石短長之節雜以咸韶蓋時
會使然故元音盡泄也孝穆振采于江南子山選聲于河
北昭明勅選六代範此規模彥和著書于古傳茲科律迄
於陳隋極傷靡敝天監大業之閒亦斯文升降之會哉唐
初四傑竝駕一時式江薛之靡音追庾徐之健筆若夫燕
許之宏裁常楊之巨製會昌一品之集元白長慶之編莫
不竝投龍文聯登鳳閣至于宣公翰苑之集篤摯曲暢國
事賴之又加一等矣義山飛卿以繁縟相高柯古昭諫以
新博領異駢儷之文斯稱極致趙宋初造鼎臣大年猶沿

唐舊歐蘇王宋始脫恒蹊以氣行則機杼大變驅成語則
光景一新然而衣辭錦繡布帛傷其無華工謝雕幾簾業
呈其樸鑿南渡以還浮溪首倡野處西山亦稱名集渭南
北海竝號高文雖新格別成而古意寢失元之袁揭冕弁
一世則又揚南宋餘波非復三唐雅調也載稽往古統論
斯文日月以對待耀采草木以錯比成華玉十穀而皆雙
錦百兩而名匹明堂斧藻視畫績以成文階肥筮鏞聽鏗
鏞而應節自周以來體格有殊文章無異若夫昌黎肇作
皇李從風歐陽自興蘇王繼軌體既變而異今文乃尊而
稱古綜其議論之作竝升荀孟之堂核其敘事之辭獨步
馬班之室拙目妄譏其紕繆儉腹徒襲爲空疎實沿子史

之正流循經傳以分軌也考夫魏文典論士衡賦文摯虞
析其流別任昉溯其原起莫不謹嚴體製評騭才華豈知
古調已遙矯枉或過莫守彥和之論易爲真氏之宗矣我
師烏程孫司馬職參書鳳心擅雕龍綜覽萬篇博稽千古
文人之能事已攬其全才士之用心深窺其祕王銍選話
惟紀兩宋謝伋談塵畧有萬言雖創體裁未臻美備況夫
學如滄海必沿委以討原詞比鄧林在揣本而達末百家
之雜編別集盡得遺珠

七閣之祕笈奇書更吹藜火凡此評文之語勒成講藝之
書四駢六儷觀其會通七曜五雲考其沈博而且體分十
八已括蕭劉序首二篇特標騷選比青麗白卿雲增繡黼

之輝刻羽流商天籟邊笙簧之響使非胸羅萬卷安能具
此襟期卽令下筆千言未許臻茲醞釀也元才困陋質心
好麗文幸得師承側聞緒論妄執丹管而西行願附驥尾
而于里固知盧王出於今時流江河而不廢子雲生於後
世懸日月而不刊者矣

重修會稽大禹陵廟碑

阮元

粵昔五德代興紀號天中二典遞禪立都西北惟神禹之
陟降皆在江水治水之終始皆在會稽何則履已西夷生
蕙苴于石紐江之原也曼民東教封葛桐干會計江之委
也若夫黃帝中經所載宛委覆釜所藏登臨夢發金簡玉
瑑出焉灑沉澹災底定者千八百國其始通水之理實在
會稽至于會諸侯詔羣神誅後聖者而大計其功墮蟻已
甚絃絨猶薄迄于今參耕之畝宛然非古之上壟歟然則
月逾庚子年加申酉亦終乎此矣或謂九州修貢山川成
書會稽主名不著于冊然三江分派以浙水爲南支萬里
岷流指山陰爲歸宿古今遷異俗儒駭之是知胼胝勞蹟

必登茅山之巔成旅中興實存大越之祀也吳越春秋謂
少康封庶子無余於越春秋祠禹墓於會稽漢書地理志
會稽山有禹井禹祠是故陵之有廟其來已古我

朝

列聖相承纘舊績以平水土東南江海間幾勞太僕之駕
焉今嘉慶歲星次庚申

聖天子孝祀配天望辯維謹乃修階壇勤丹雘用承祀事
巡撫阮元來拜廟下以考其成巖壑盤鬱江海深阻維茲
廟貌巍然鎮之蠲精玉帛如來百神之朝馳慕風雲或降
二龍之駕郁郁平蒼水探穴于其初元圭墳德於其既固
夏后氏神聖之所發藏亦吾

聖天子之所以稽古帝報功德也爰作頌詩銘諸樂石其
辭曰

浙爲南江地臨越絕青泥藏書白雲出穴陵者莖陵跡留
標樞農不變徒樹不改列厥有原廟肇祀少康山川風雨
日月陰陽階扶窆石棟抗梅梁聿新世室載啟元堂昂星
孕珠岫山輯玉黻冕天容龍蛇古屋伯益奉經庚辰侍輦
封並蒼梧廟同嶽麓

龍飛五載障淮塞河錢塘榘石海無驚波新廟奕奕南鎮
窾窾神功

聖德今古若何馬祠遺法烏田修祀鷗享金鼎符探玉笥
漸海訖聲登山刻字被碑以文載之曩風

詹麟飛獨繭詩鈔序

王芭孫

詹子麟飛以徽婺之英僑居吾地自其少小揚蕤脫穎翹然輩中長爲諸生會

天子南巡獻賦者再韻輝鸞鳳翔舉輦下振奇人也間好爲詩有獨繭詩鈔一卷篇體光華洋洋甚綺敷句爲春則花新葉早縱心極暢則劍拔弩張關玉潤珠涉目有獲鏤金錯采措手綦難屬序再三子故遲之少陵有佳句之慚子雲有少作之悔予序麟飛當有待矣夫詩之爲事不在高談求端晉宋亦云易誦然士衡示緣情之教東莞垂體性之篇體性之子自有清華緣情之主要歸虛靜誠以水性虛而淪漪渙山體靜而紫翠在此範德之宗而亦筌文

之樞也既氤氲乎情性必杼軸于悲愉元解之宰定于語
先獨照之匠運乎言外外文綺交內義脈注詎惟一篇之
內逆萌追勝且復一集之間要終原始此又馭文之操柄
也至于宋裁唐製呀啟千門魏體漢京鎔歸一範辨源涇
渭之流確量權衡之下事則師古辭由已出斧斤時人非
曰伐材區畛徧歷將求識路因先士之茂製發吾人之本
懷此又尋文之蹊要也酌此三物貫以九變然後望今騁
路希古窮塵迺稱能耳不然情數詭雜體統遷貿徒爾鐫
華亦聊可騁聲塵路而已譬諸草木陽春三月披然絢望
協風告勸紅如之何矣積雪在陰綠如之何矣鱗飛意氣
聳邁俊無留賞車輕御良一息千里他日者長慶之集副

在名山呂覽之書懸視通國必有進乎此者吾斷元冥夫
猶泚筆俟之焉

橫雲秋興圖記

王芑孫

嘉慶十一年楞伽山人倦遊而歸逍遙家巷徂暑告期眷
言東邁理訪舊之輕舫倚探幽之孤筇至乎五茸之城息
乎三宿之齋三宿齋者沈子屺雲所居以山人昔嘗三宿
于是而名焉者也于時處處隱几若忘有來于于幅巾相
命言詠之餘極興登陟懷舞雩于曩篇感流火之新節于
是兼露欲白蘭風未秋指林麓以就涼適莽蒼而散賞遂
以七月癸亥偕遊橫雲山焉橫雲勝冠九峯地背二泖紺
厓赤壁石氣自華短竹疎松山膚俱瘦繚繞宿雲之陽併
側含清之堂披叢薄據磐陀樵牧縱橫臯壤搖落昔之清
臺煥館今爲牛欄雞棲俛仰盛衰儵忽旦暮秋裕未御秋

心在襟奚有壺而弗傾用舉觴以互勸行厨再飯下漏三
箭是夕也月挂壞樞雲堆敗絮殘夜生明濕螢朗逕秉燭
相攜藉草更酌不覺申旦翌日甲子相與方舟汎泖抵小
金山乃還寺樓飛丹堦影倒碧吾生眇茫身世瓠浮爰覽
在昔蘇子之著履有擬爲仙謝公之遊山或疑是賊斜川
欣對人物並傳西園晤語警欬如接豈不以圖畫哉以山
人一日之閒以踐諸君彌歲之約不宜罔志也繇是南匯
周謨爲之寫貌華亭改琦爲之補圖八月壬午圖成其青
衫朱履援筆摩厓而書者山人也時年五十二從後立觀
者吳縣徐穎季雅年二十六與穎差肩而面皙者華亭沈
恕岷雲年三十二采芝嬉其傍者恕之少子六郎始六歲

倚竹撚髭者華亭徐士泰雲舫年四十五穿竹逕以出有
臥栢遮其前者嘉興馮建蓀秋晚年二十八坐而垂竿者
華亭梅春小庾年三十二隔水觀釣者琦也琦字七薌年
三十四步履過橋童子抱琴隨之者華亭王泰二懷年三
十八雜樹丹黃相錯虧蔽其半身者華亭倪觀正竹於年
四十一對奕竹間一人探手入匳者婁縣張公璠元卿年
二十二一人睨局舉子而未定者怨之弟懋念生年二十
一坐而觀者謨也年四十三凡十有三人年最長者山人
最幼六郎是圖也將付六郎藏之云

國朝駢體正宗卷八